

冷

廬

雜

識

清陸以湉著

第四冊

進步書局校印



冷廬雜識卷五

清 桐鄉陸以湑敬安著

醫學源流論

徐靈胎醫學源流論云。有病固當服藥。乃不能知醫之高下。藥之當否。不敢以身嘗試。莫若擇至易輕淺。有益無損之方。以備酌用。如偶感風寒。則用葱白蘇葉湯。取微汗。偶傷飲食。則用山楂麥芽湯。消食。偶感暑氣。則用六一散。廣藿湯。清暑。偶傷風熱。則用燈心竹葉湯。清火。偶患腹瀉。則用陳茶佛手湯。和腸胃。如此之類。不一而足。即使少誤。必無大害。又有藥似平常。而竟有大誤者。如腹痛嘔逆之症。寒亦有之。熱亦有之。暑氣觸穢。亦有之。或見此症。而飲生薑湯。如果屬寒。不散寒。而用生薑。熱性之藥。與寒氣相關。已非正治。然猶有得效之理。其餘三症。飲之必危。曾見有人中暑。而服濃薑湯一碗。覆杯即死。若服紫蘇湯。寒即立散。暑熱亦無害。蓋紫蘇性發散。不拘何症。皆能散也。按此論。懲藥誤而發。微病用之。最為穩善。養生家不可不知。

嘉靖冤獄

明嘉靖時冤獄。莫甚於李福達。而陳沈次之。皆因議禮而成。以是知名不正。必至於

刑罰不中也。又張福獄亦由私忿而致奇冤。李福達事見馬錄傳。陳沈事見葉應龍傳。張福事見熊浹傳。比類觀之。可以知其失矣。

賜書加點

侯景將鎮河南。請於高歡曰。今握兵在遠。姦人易生詐偽。大王若賜以書。請異於他者。許之。每與景書。別加微點。雖子弟弗之知。及歡疾篤。世子澄矯書召之。景知偽懼。禍乃降梁。隋文帝愛其子漢王諒與之約。若爾書召。驗親敕字加點。又與王麟符。合則就道。蓋即襲景之智。景大惑不足道。隋文廢長立愛。乃亦假小智以濟私恩。宜其速底敗亡。致諒亦不得其死也。

常食之物

醫家謂粟百益一損。梨百損一益。韭與茶亦然。余謂人所常食之物。凡和平之品。如參苓蓮子龍眼等。皆百益一損也。凡峻削之品。如檳榔豆蔻仁煙草酒等。皆百損一益也。有益無損者。惟五穀。至於鴉片煙之有損無益。人皆知之。而嗜之者日衆。亦可憫矣。

方文翰

乾隆時淳安方文翰大令桑如主講杭州紫陽書院。題中名士如陳勾山太僕兆崙杭堇浦太史世駿金長孺大令虞皆不服。乃拈驅蛇龍而放之菹題為課。諸人所作才氣雄肆。祇就驅字放字著筆。乃作獨詮發道字。眾始悅服。

何文安公輓聯

道州何文安公師凌漢。幼失怙恃。家貧。立志勵學。通籍後。疊掌文衡。道光辛卯。典浙試。後即督浙學。待士外嚴而內和。校閱公明。士論翕服。庚子。薨於位。海內之贈祭文輓聯者。嗣君編錄成集。刊之。今摘其尤於左。英相國和云。再世獲傳衣。最喜緣深堪歷久。三台期接席。那知望切竟成空。副憲毛伯雨師式郇云。累世簪毫。方期啟沃酬恩。尚克同心作霖雨。數旬駢牡。豈意春明話別。不堪回首望停雲。曾京卿望顏云。朝露洒遺牋。問幾人東閣重窺。有子才如蘇右相。春明陪末座。憶兩載南車親奉。前賢悵失鄭司農。錢給諫儀吉云。淵雲大文。趙張為政。奮建家風。時望兼漢廷數子。省臺故事。都邑謳思。門牆述訓。令名傳荆國先賢。鄂太史恆云。一品荷殊榮。文望官聲端謹。咸欽臣節粹。千秋逢異數。崇銜美謚。幽冥應感聖恩深。汪明府仲洋云。踐道一身脩。貫乎言功者德。易名當代少。止於理義曰安。

洪地齋

臨海洪地齋孝廉坤煊負異才。朱文正公視學至台。地齋方居內艱。物色得之。命以墨經與古學之試。遂於乾隆己酉歲拔入成均。與蕭山王琬馨紹蘭東陽樓更一上層齊名。稱為浙東三傑。壬子應試北闈。報捷後偶感時疾。自疑虛羸。誤服參苓而卒。距揭曉甫十日。宋猶山明府世榮悼以詩云。泥金報捷正喧聞。誰遣巫陽下九天。泉路又添才鬼席。家門剛啟賀賓筵。元城空說留經笥。伯道何時卜墓田。太息都門分手日。八街槐影語纏綿。藉甚文名落拓身。每於疎散見天真。憐才竟負朱公叔。貌空傳杜子春。地齋目微眇萬卷書憑棺束骨。千金方誤藥沾唇。地齋知醫自都門舊雨知飲其方而卒無幾誰送靈輜下潞濱。

灤陽于役圖

先伯父少石公官京師時。與諸名流為詩酒之會。江都羅兩峰布衣聘亦與焉。乾隆壬子三月。公奉命往熱河校文津閣四庫書。羅為作灤陽于役圖。並題詩云。欲雨不雨吟春陰。欣然結社成詩林。觴詠同君展修禊。恐此會後還追尋。春華正放長安陌。駕言灤陽事行役。僉云小別各罄懽。莫負當筵酒脂碧。圖作青綠山水。著色不多。

神韻獨絕

大成殿藏舊主記

杭州府學文廟重修於嘉慶壬戌年。時司事者為邵上舍志鋌。以廟主已敝。乃更易新者。藏舊主於大成殿座後。而為之記。錢塘陳曼生司馬鴻壽書之。刊於大成門外東廊。其辭曰。攷古廟主。藏用石室。有事則陳。既納北壁。為辟火災。兼示靜謐。後世敬禮。備謂尊不可撤。以座甬主。丹漆是飾。維大成殿座尊後世式。厥制崇高。工用鏤刻。歲久勿治。華采或蝕。茲廟貌既新。敬鳩眾力。儲材重作。舊觀勿失。又今兩廡主。改選嘉栗。尊新藏舊。藏處宜密。謹於座後。仿古夾室。畫安舊主。俾永無佚。藏同桃主。惟祭不必出。爰識始末。使後重修者悉。時元默閣茂壯月吉日。承修學宮人邵志鋌謹述。

鮓魚

爾雅。鮓當鮓。郭璞注。今江東呼最大長三尺者為當鮓。邵氏正義。謂即鮓魚。杭州鮓初出時。豪貴爭以餉遺。價甚貴。寒窶不得食也。凡賓筵。魚例處後。獨鮓先登。胡書農學士詩云。銀光華宴催登早。鯉味寒家餽到遲。體物殊切。

史文靖公

漂陽史文靖公貽直。祖鶴齡。父夔。子奕簪。四代皆以翰林起家。公於康熙庚辰聯捷成進士。年甫十九。在外督撫七省。在內六官之司。罔不爰歷。居相位垂二十年。名注朝籍六十四年。乾隆庚辰重赴瓊林宴。癸未薨於位。年八十二。名位福壽罕有其比。

科名盛事

本朝祖孫會狀。惟長洲彭侍講定求。及其孫尚書啟豐。尚書之壻。陽湖莊學士培因亦大魁天下。可稱科名盛事。

討賊誓詞

明臨海陳木叔函輝。嘗作告太祖討閩賊誓詞云。敵王所讎。請共揮魯陽指日之戈。與子同仇。應先擊祖。溯渡江之楫。又云。濟則君之靈。為臣無二心。在人之內。誓死靡他。讀之覺忠義之誠溢於言表。

凡將篇

司馬相如凡將篇云。鐘磬竽笙。筑坎篪。同時相梁臺詩云。枇杷橘栗桃李梅。句法相類。其源蓋出於詩經。椅桐梓漆。緜繒鯉等句。而七字成句。則如禮記喜怒哀懼愛

惡欲爾雅。永悠迴遠。遐邇聞緝熙。列顯昭皓穎等語。已肇其端。迨史游作急就篇。稻黍稷稷粟麻稊等句。亦皆以七字隸七物。後世詩人多效之。如韓昌黎陸渾山火詩。鴉鵲雕雁鷹鵠鷗。蘇東坡韓幹牧馬圖詩。騅駟駟駟駟駟駟。劉青田二鬼詩。蚊蠅蚤蠅蠅蚋等句。其尤著者也。

師古

事必師古。然亦何可泥哉。齊泰黃子澄。援漢削藩之議。而燕師以起。楊士奇楊榮。引棄珠崖之說。允安南黎利立陳氏為後。遂致棄地殃民。馬中錫效翼遂化渤海盜事。撫令流賊解散。卒無功致謗。下獄死。漫言法古。而不審時度勢。以圖之。鮮有不敗者也。

文辭襲用

古人文辭。有不嫌襲用者。鄒陽諫吳王書云。驚鳥累百。不如一鶚。樊準薦龐參書用之。孔融薦禰衡書亦用之。三國志呂蒙傳亦用此語。

鄭荃陽

明崇禎時。武進鄭荃陽翰林鄆。以杖母之誣。受極刑。漳浦黃忠端公道周。謂正直而

遭顯戮。文士而蒙惡聲。古今無甚於此者。餘姚黃徵君宗義。作荏陽墓表。謂公為奸相。溫體仁所陷。路人知之。而杖母流言。君子能亮之以理。未必驗之以事也。水落石出。余詳之。公卿之賢者。儀部峯陽之眷一妾。具夫人不能容。儀部遂挾妾以出。流轉僧寺。頗為人所指目。公無可奈何。而夫人篤信佛乘。與一尼甚暱。公求尼為之勸解。尼神道設教。假真仙言。上帝震怒。將降禍於夫人。夫人受戒悔過。儀部始得安其室。一時好事相傳。以竹篋參話之法。訛為扑作教刑之事。當公之受誣。欲陳其本末。則恐有礙於父母。故甯隱忍就死。齋冤於地下。豈非仁者之心與。雖然。儀部之眷妾。夫人之妬。親之過小者也。使公蒙詬醜大誹於天下。其輕重可無辨乎。是故公之獄不明。則奸相之惡不著。此後死者之責也。峯陽事載於明史者未詳。得徵君之文而始白。吁。以莊烈帝之偏忤。溫體仁之狠賊。鍛成此獄。可謂奇冤。

為學之道

凡為學之道。見聞欲其博。術業欲其約。蕭山毛太史奇齡。作詩古文。必先羅列滿前。考核精細。方伸紙疾書。其夫人陳氏。性悍妬。以毛有妾曼殊。輒詈於人前。曰。爾輩以毛大可為博學耶。渠作七言八句。亦必獮祭所成。毛笑曰。動筆一次。展卷一回。則典

故純熟終身不忘。日積月累。自然博洽。嘉興錢文端公陳羣少時嘗問於秀水徐闇學。嘉炎曰。學何以博。徐曰。讀古人書。就其篇中最勝處記之久。乃會通。後述於朱太史彝尊。朱曰。斯言是也。世安有過目不遺一字者耶。姚姬傳比部嘗微作詞。嘉定王太常鳴盛語休甯戴太史震曰。吾昔畏姬傳。今不畏之矣。彼好多能。見人一長。輒思並之。夫專力則精。雜學則粗。故不足畏也。姚聞之。遂不作詞。且多所捨棄。以古文明世。余按此三者。皆為學切要之言。有志者當奉以為法。

王文成公用兵

王文成公好講學。而精於用兵。其討大帽山賊師富也。指揮豐桓縣丞紀鏞戰死。公親率銳卒屯上杭。佯退。師出不意搗之。連破四十餘寨。遂擒師富。其討橫水賊謝志山也。先遣四百人伏賊巢左右。進軍逼之。賊方迎戰。兩山舉幟。賊大驚。謂官軍已盡。犁其巢。遂潰。乘勝克之。其勦餘賊於九連山也。山橫亘數百里。陡絕不可攻。乃簡壯士七百人。衣賊衣。奔崖下。賊招之上。官軍進攻。內外合擊。禽斬無遺。宸濠之亂。慮其出長江。順流東下。則南都不可保。因先遣間諜以計撓之。凡此皆出奇制勝。所謂兵不厭詐。非小儒所能知也。

从吉

三年之喪乃凶禮之大者。世俗居喪而通名以慶賀。必書从吉。失禮甚矣。至父歿母存。則曰孤子。襲古昔有國者之稱。通人亦嘗辨其非。然猶可援孟子窮民之說以爲解。未若从吉之尤謬也。

至公堂

貢院至公堂。有高宗純皇帝御題聯云。立政待英才。慎乃攸司。知人則哲。興賢共天位。最哉多士。觀國之光。又御題七律四首。結句云。寄語至公堂裏客。莫將冰鑑負初心。大哉王言。洵足爲主文者儀式也。

父子同試鴻博

康熙己未博學鴻詞科。有父子同試者。山陽張鞠存吏部新標。毅文太史鴻烈是也。吏部以順治己丑進士官中書。擢主事。時漕使者任諸蠹胥。播惡江淮間。吏部甫釋褐。即抗章發其惡。贖累巨萬。下巡按御史秦世楨案驗得實。竄殛有差。朝野咸稱其風節。

五絕佳作

杜于皇渚詠東坡云。堂堂復堂堂。子瞻出峨眉。少讀范滂傳。晚和淵明詩。王百朋錫詠太白云。誰道謫仙狂。豪情託舉觴。目無高力士。心識郭汾陽。以二十字渾括其生平。在五言絕句中。雖為別調。然自是佳作可傳也。

凌蔭沅

錢塘凌蔭沅女史祉媛。丁松生丙之室也。事親孝。兼工詩詞。于歸一載。遽卒。松生為刊遺稿。翠螺閣詩詞。詩如裏湖櫂歌云。輞川莊外浪迢迢。攜得青樽復碧簫。商略儂舟泊何處。嫩寒春曉段家橋。詞如菩薩蠻云。簷鈴驚破紅閨夢。曉妝人怯餘寒重。纖手捲簾衣。風前放燕飛。落紅紛似雪。倦了尋香蝶。樓外易斜暉。春歸人未歸。皆清逸。女史生於四月八日。製有玉牌。鐫與佛同生四字。

孔梧鄉

同邑孔梧鄉廣覃。司訓臨海。余與居同里。及官台麗學。晨夕往來。情好彌洽。嘗贈以詩云。閉戶尋真樂。全忘禮法苛。閒身書供養。豪氣酒消磨。官冷何妨懶。詩傳不在多。從游倘相許。未厭數經過。孔詩筆俊爽。如其為人。尤長於七律。放懷云。傳到千秋人。幾何。茫茫身世太蹉跎。出山踪跡雲無定。逝水生涯夢易過。可惜後來知者少。不堪

前事愧吾多。放懷且飲尊中酒。眼底升沈一刹那。偶作云。亂書堆裏置身寬。我本儒生稱此官。境到悟時心漸歛。過因改後夢方安。不知報德談何易。可惜留名事大難。且向燈前課兒讀。幾家傳得舊瓊寒。

鯤溟姪

鯤溟姪憲曾秉性聰穎。為先伯父少石公所鍾愛。道光辛巳鄉試。僥得復失。以是抑鬱無聊。復患咯血病。遂棄舉業。入貲為州吏目。需次畿垣。詩名藉藉。大府皆垂青焉。姪與余總角時共硯席。每分題賦詩。吟哦達旦。壯歲睽離。郵筒常寄詩酬和。姪有懷余詩云。讀過書應嫌我少。刪余詩尚比人佳。又云。百里知難屈俊賢。天台杖策望如仙。平生道學兼文藝。不獨才名媲鄭虔。推崇過當。心竊愧之。丙午。余讀禮家居。姪亦奉譴南還。以所著繕性居詩草見示。謝華啟秀。造詣乃益精矣。錄其尤者於此。易水弔荆軻云。萬死無回顧。荆卿亦大難。囊中利匕首。眼底白衣冠。熱血一朝灑。悲風終古酸。英雄成敗異。不必咎燕丹。保定秋思和綸齋三弟秉樞都門秋思韻云。有弟長安市上游。合併蹤迹海中漚。弟客京華。余羈保定。距三百里。聚晤不易。著書同作千年計。識字常擔萬古愁。少日有才期用世。異鄉無客不悲秋。阿兄潦倒今尤甚。更許添修五鳳不岳忠武。

王墓云。沈沈鐵像跪孤境。一代賢奸衆目分。只爲南軒能幹盡。青山寂寞曲將軍。反游仙云。卿環秘冊費深藏。只是黃芽絳雪方。易造玉樓難作記。始知人世有文章。露筋祠云。曾從江上弔曹娥。又挂輕帆此地過。庸行千秋歸女子。死貞死孝兩難磨。

女弟子

毛西河集附徐都講詩。其女弟子徐昭華所作也。初昭華請業於西河。命題仿六朝體。賦得拈花如自生詩云。明珠照翠鈿。美玉映紅妝。步移搖彩色。風回散寶光。蛛絲髻上繞。蝶影鬢邊翔。誰道金玉色。皆疑桃李香。擬劉孝標妹贈夫詩云。流蘇錦帳夜生寒。愁看殘月上欄杆。漏聲應有盡。雙淚何時乾。又云。芙蓉花發滿池紅。黛烟香散度簾櫳。畫眉人去遠。腸斷春風中。西河深賞識之余。尤喜其塞上曲云。朔風吹雪滿刀鏐。萬里從戎何日還。誰念沙場征戰苦。將軍今又度陰山。長雲衰草雁行平。沙磧征人向月明。思婦不知秋夜冷。寒衣還未寄邊城。驍騎三千出漢關。雕戈十萬卧燕山。月明近塞頻驅馬。尚有將軍夜獵還。感慨豪宕。出自閨閣。洵非易及。西河序其詩云。昭華既受業傳。是齋中。每賦詩。必書兼本。郵示予。請益。陸續得如千首。留其帙。不忍毀去。遂附予雜文後。存出藍之意云云。近日袁隨園女弟子詩。蓋仿此而益臻其

盛然人既多而詩不盡佳失之濫矣

自然氣化

龍易骨蛇易皮麋鹿易角蟹易螯人則易齒此自然之氣化也

揚雄

柳仲塗謂揚雄劇秦美新譏莽而非媚莽且以雄之著書而作經籍為聖人曾南豐謂雄處王莽之際合於箕子之明夷王介甫謂雄之仕合於孔子無不可之義其餘覆之者未遑悉數自朱子綱目書莽大夫而論始定近世文人復有襲柳氏諸家之說為雄辨白者然皆偏護之見終無以易乎朱子之說為能得其真也

明閣臣狀元

明閣臣百六十八人史無傳者二十六人權謹洪熙張瑄陳山宣德苗衷正統俞綱王一甯

景泰靳貴正德袁宗皋賈詠張壁張治呂本嘉靖呂調陽余有丁萬曆史繼偕周如磐丁紹軾

朱延禧馮銓黃立極張瑞圖施鳳來啟來宗道楊景辰何吾騶謝陞崇禎明狀元八十

九人史有傳者三十八人而已吳伯宗任亨泰黃觀張信洪武胡廣建文曾榮陳循永樂馬

愉曹鼐宣德劉儼商輅彭時正統羅倫吳寬謝遷費宏成化倫文敘康海顧鼎臣弘治楊慎唐

皋舒芬

正德

羅洪先

唐汝楫

申時行

嘉張元忬

沈懋學

隆慶

朱國祚

翁正春唐文獻焦竑

黃士俊周延儒錢士升

萬曆

文震孟

天啟

劉理順

劉同升

魏藻德

崇禎

複句

論語有複句而不相連者。如馬用佞弗如也。賢哉回也。禹吾無間然矣。天何言哉是也。孟子亦有之。戰國策史記效之。而文法益變矣。

發語辭

經書發語辭。尚書最多。都兪吁咎嗟猷等是也。論語噫字。孟子惡字。禮記嘻字。左傳呼字。史記唉字。謏字。咄字。此數字亦互見於他書。至嚇字則惟莊子有之。

古列女傳

春秋時婦人以全節著者。詩惟共姜。春秋惟紀叔姬。劉向古列女傳乃增衛宣夫人蔡人之妻。息君夫人。齊杞梁妻。楚平伯嬴。楚昭貞姜。楚白貞姬。其說有異於諸家者。且晉國懷嬴列於節義。則是不再嫁矣。說亦與左傳異。

潘太守詩

湖北興國潘太守觀藻。官台州有年。其同年某侍御以葬父告貸不允入都。嗾同列

効其過誤。罷官。賦留別台州詩。為時傳誦云。為觀日出躡三台。萬八峰頭滌筆來。碧海笑看鯢變化。青天自許鶴徘徊。平臨箕斗空成錦。管領湖山信費才。好謝石梁雙澗瀑。年年花發淪離杯。休道壺瀛最上頭。三山纔近好風收。一麾到海真蛇足。八口浮家問鶴樓。魔力能噓無縫壚。含砂偏射下灘舟。波濤見慣歸帆穩。山月江風鄂渚秋。桃源歸遡楚江清。十萬花光夾岸迎。宦海浮沈今結局。堯天歌詠付餘生。黃冠紫綬都如夢。紅樹青霜餞此行。莫待瀟湘芳草綠。春山處處子規聲。書生面目太酸寒。試著初衣覺便安。不厭清貧求小艷。也須福慧了簾官。無田致悔歸田晚。到海信知觀海難。敢對西風怨搖落。賦閒原是賦秋潘。

唐伯虎

宋有二唐伯虎。一眉山人。唐庚之兄。初名瞻。後名伯虎。見宋史文苑傳。一金州人進士。終梧州推官。見王鞏隨手雜錄。

臬字入詩

臬字入詩。少陵朱門酒肉臭。道有凍死骨。獨有千古中州集。劉內翰瞻。厨香炊豆角。井臬落椿花。亦自可誦。然不可以擬杜詩矣。